

KERWEREDD 1994

Ehr lieue Leit unn Kerwegäscht,
heit feiere mer unser schenschdes Fescht.

Ich griëß Eich all, ehr Nerremohrer Leit
unn all die aus de Umgewung, die debei sinn heit.

Mer begrieße a all die Fremde unn die vumm vorige Johr,
kommen ruhisch e bisje näher, heit werd was gebot in Nerremohr.

Unser Straußbuwe unn Määd, die sinn rischdisch froh,
daß mer unser Kerb kenne halle uff der Baustell do.

Unser Kerb werd heit net nur iwwerdra vunn RTL zwei,
ne, a die ARD unns ZDF sinn heit met debei.

Ich bin zwar kee Moderator, der wo iss gewesch met alle Wasser,
ich bin ganz schlicht unn efach Eier Stephan Strasser.

Es Wetter iss herrlich, die Sunn die brennt,
es iss so schee, daß es net schenner sinn kennt.

(Heit isses net schee unn die Sunn dut net brenne,
näkschtens muß de Petrus die Wettervorhersage verpenne.)

Doch bevor mer jetzt zum Dorfgeschehe komme,
speelt unser Musik ganz barsch:
“De Nerremohrer Kerwemarsch.”

Straußbuwe, wemm iss die Kerb ? ...

Es Läuse besteht tagaus, tagein,
aus schaffe, schaffe, pünktlich sein.

Amme Owend konnt mer in Lautre sehe,
e junger Mann an sei Auto gehe.

Als er wollt ins Auto eninn, merkt er,
die Deer iss zu unn de Schlisset steckt drin.

De Georg net dumm, hat schnell iwwerleet,
bevor er dann zum Martin niwwer geht.
“Martin, mei Freund, Du helfsch mer doch, gell?
Ich brauch de Ersatzschlüssel unnn zwar schnell.”

Die Zeit drängt, ich du net blaffe,
um zehn Uhr muß ich in die Opel ofange zu schaffe.

Um Vertel no Neun iss de Martin an de Ampel vorm Massa,
unn um halwer Zehn in Nerremohr - wie e Pascha,

Beim dritte klinge le reißt es Christine es Fenschder uff,
“Was issen los, komm doch eruff!”

De Georg meent, ruf noch in de Opel an,
daß ich heit owend e bisje schpäder bin dran.

Im Auto dann -- de Georg em Martin noch beicht,
daß sei Tankanzeige schunn lang uffleicht.

Schnell es Auto gchol unn ab zum schaffe,
er kommt noch pünktlich o - doch de Mäschder muß lache,
veschwitzt, kabutt unn abgehetzt erfahrt unser Langer voller Wonne,
daß er hatt gar net schaffe brauche komme !

Die Musik schpeelt dem Mann, oh weh.

“Es näkschde Mol schaff ich bei VW !”

Straußbuwe, wemm iss die Kerb ? ...

Do vorre im Wänerschdall -- jo all wohlbekannt,
werre seit neischdem alle Autos umgerannt.

Dann will enner vunn seim Grundstick mem Bulldogg rausfahre,
langts hinne unn vorne net met seim Ohängerwage.

Des hann mer glei, denkt der gute Mann
unn ruft sofort de Beiermäschder an.

Der kommt uff de Stell gerennt, guckt unn stellt sich hin
unn denkt: "Ä Glick, daß ich dodefor net zustännisch bin."

Die Politess war schunn do unn a die Polizei,
doch an de Verbandsgemää feht kä Weg vorbei.

Jetzt geht also die Fahrt no Ramschde zum Julius,
doch der iss taktisch, e richticher Filius.

Er iwwerleht net lang unn kommt schnell druff
unn stellt zwee Halte-Verbotsschilder uff.

Jetzt blockere kä Autos meh -- das kenne ner sieh,
ess steht nur noch e Bulldog allä uff de Prärie.

Mehr Junge do uff de Fels wolle jetzt a e Ampel hann,
damet mer wennischdens bei Grün a mol fahre kann.

Ehr Musikante, schpeelet jetzt net ohne:
"De Wänerschdall gebt verkehrsberuhigte Zone."

Straußbuwe: Wemm iss die Kerb ? ...

Mehr do vumm Dorf sinn richtisch froh,
daß unser Freiwillige Feuerwehr iss immer do.

Brennt's irgendwo, orrer hockt e Katz uffm Baum,
kommt'se angefare met ehrrm Schaum.

Do vorre, am Heisje war e Baam ganz krumm,
de Traumer hat gefroht unn sie sinn glei kumm.

Met veel Geräte fangen se an se fälle,
doch plötzlich fangt e Ascht o se schnelle.

Ä Ascht steht hinnerm Geländer ganz steil,
doch beim Abhacke fällt der Ascht uffs Seil.

Dann hert mers noch krache, o Schreck, o Kraus --
de Maschde fällt um unn die Lichter gehn aus !

Doch unser Feuerwehrmänner, ganze Kerle met stramme Wade,
mache an de Helme ehr Lichter o, unn behewe de Schade.

Nadeerlich hat das denne Männer geschtunk,
denn an dem Mascht hann die Scheinwerfer gehunk.

Jetzt iss alles erumm unn die Männer sinn froh,
doch hoffentlich gchn heit owend die Lichter do oh.

Die Musik schpeelt met viele Witze:
"Es näkschde Mol dunner nur noch Wasser spritze."

Straußbuwe, wemm iss die Kerb ? ...

Am ledschde Fedderweißerfescht, do gab's e Schau,
do hat Emriche Steffen als Geschenk kriet e Sau.

Die Sau war noch klää, e ganz wildes Schtick,
hoffentlich bringt die demm e Menge Glick.

Schpäder am Owend ging die Poscht dann ab,
denn dann hammcr die Mäd gehall uff Trab.

Die wo's längscht konnt trinke unn wo's mäschd ging eninn,
die sollt gewwc unser Weinkönigin.

E Märe hat's geschafft unn wurde gekrönt,
de ganze Kopp wurde met Weinblätter verschönt.

“Bianca, die Erschde” — iss Gott vergelt's,
die nei Weinkönigin do vunn de Fels.

Apropo Fels - gucken Eich emol ganz genau um,
daß dojowwe was gebot werd, das merke ner schunn.

Unn wenn Ehr Samstags emol Zeit hann unn nateerlich noch Kraft,
dann kenne ner nuff komme, do werd immer geschafft !

Ah unser Vereinshaus strahlt bald in niem Glanz,
met ganz neie Toilette ohne veel Firlefanzen.

Doch de Lichtblick dojowwe, so saan se all im Chor,
sinn unser neie Wertsleit aus Nerremohr.

Do kannsche alles esse, vurnm Schwein bis zum Rind,
doch vor allem, weil se sehr preiswert sind.

Ach - unn die Eisbecher erscht, die sinn e Gedicht,
ich saas Eich, do jowwe kriener fascht jedes Gericht.

Mehr Straußmäd unn -buwe rufe ganz. feste:

“Unser Susi iss efach die Allerbeste !”

Ehr Musikante schpeelen jelzl uff, daß es schallt:

“Mehr lieve unser Fels im Wald !”

Straußbuwe. wemm iss die Kerb ? ...

Ältere Leit, die hann oft Probleme
unn wenn se e Auskunft brauche, sollten se sich net schäme,
denn sie finne immer, das iss werklich wohr,
e Ansprechpartner memme offene Ohr.

E ältere Fraa fand a bei manche Paragraphe kä Sinn
unn iss dodewe zu ehrer Ortsbürgermäscherin.

Die hatt lang iwwerleet, dann hot'se zum Schluß e Dusel,
"Ich fahr Sie schnell zur landwirtschaftlichen Beratungsstelle no Kusel !"

Dort saß e fachkundiger Mann aus Nerremohr,
doch der hot fer die Probleme zuerscht kä Ohr.

Der hat gemeent: "Die Fraue sollte lieber Käsekuche backe unn in de Küche walte,
unn sich net kümmerge um amtliche Sachverhalte."

Daß der do redd met ner Amtskollegin,
kam demm Mann net in de Sinn.

Obwohl er jo, das hat die Fraa gleich gewißt,
bei uns in Nerremohr de Ortsbürgermäscher ist.

Hott der Mann e Glick ~ denn daß met der Bürgermeisterin,
stand in de Kusler Ausgab drinn.

Bei uns do kenne Ehr das net heere,
denn in unserm Kreis dut sowas net bassere.

Ehr Musiker, holen die Luft unn schpeelen dann:
"Das bisje Haushalt iss doch kee Problem, sagt mei Mann."

Straußbuwe, wemm iss die Kerb ? ...

In de Friedhofschtrooß, die jo jeder kennt,
kam amme Moje plötzlich e Baufirma gerennt.

Ehr krien — das wurde so angeregt,
ein Regenrückhaltebecke angelegt.

Die do hinne im Eck freie sich, die hann das gern
unn saan: “Mer do jiwwe werre jetzt ganz modern.”

Gesagt, getan, mem Bagger werd geschowe
unn das Rückhaltebecke ausgehowe.

E jeder Trobbe finne se ganz toll,
hoffentlich werd unser Becke a ball voll.

Im Herbst unn im Winter hat’s laufend gereent,
doch kä Trobbe hat das Becke verscheent.

Im Gegenteil, der Bermm iss ferztrocke,
do kann mer sich zum Sunne ninn hocke.

Jetzt bietet sich o, daß iss gar kee Frage,
machen aus dem Becke e Kläranlage.

Dann brauche mer a kä Wasser se kaafe
unn müsse nur uffpasse, daß das Ding net dut iwwerlaafe.

Umsonst war das a net, Ehr brauche gar net se lache,
mem “Scheiße” kann mer a es große Geld mache.

Die Musik schpeelt jetzt met 100 Sache:
“Vielleicht kennt mer a e Schwimmbad drauß mache.”

Straußbuwe, wemm iss die Kerb ? ...

Dojowe uff de Fels, do iss als e Mann,
der kann das efach gar net hann,
wenn unser Susi dojowe iss ganz allee,
dann kommt er schnell unn bleibt an de Theke steh.

Er trinkt dann in Ruh - zwee, drei Flasche Bier
unn baßt uff, daß kenner macht Mätzjer hier.

Doch emol, amme owend, beim Blick uff die Danne,
kommt'em die Idee, heit geb ich mer die Kanne.

Mer hann a gefeiert in der Nacht,
unn de Toni hat uns e mancher Schoppe zuveel gebracht.

Do saan mer veel später: "Komm Theo, Du kannscht met uns heem laafe",
doch der hat uns nur groß ogeguckt, er konnt's wohl net glawe.
Unn saat met schwerer Zung so ganz bequem;
"Ich kann nimmie laafe, awwer ich fahr Eich heem."

Die Nachtfahrt werr ich nie vergesse, ich war geschwitzt bis an die Knie,
glawen mer's, seit dem kann ich kee Gaspedal mer sieh.

Die Musik schpeelt unserm Mann ganz met Bravour:
"Ess näkschde Mol mache mer am Tag die Spritztour."

Straußbuwe, wemm iss die Kerb ? ...

Do unne im Dorf, do wohnt e Märe,
das loßt sich efach net bekehre.

Macht met 18 de Führerschein, was es jo kann,
doch musses a glei e neies Auto hann.

Beim erschde Herumfahre merkt's ganz gehetzt,
de Tank werd leer, was mach ich jetzt ?

Schnell fahrt's no Katzebach im Nu,
doch die Tankstell in Katzebach hat noch zu.

E guder Mann winkt's trotzdem noch her,
zum Glick wäre die Platz vor de Zapphähne leer.

Jetzt wollt's elegant tanke, so wie's im Buch war oogebb,
doch heiliger Strohsack, wo iss mei Tankdeggel geblebb ?

Ganz verschreckt geht's um's ganze Auto erumm
unn hat ne uff de anner Seit endlich gefunn.

Jetzt frot's sich noch, Blitz unn Donner,
wie krien ich jetzt denne Hahne runner ?

De Tankwart lacht unn will helfe, das iss jo kä Drache,
doch es Birgit saat: "Danke, ich kann das selwer mache."

Ver 47 Mäck unn e paar Grosche dut's Benzin abzabbe,
geht in de Lade unn will's Geld berabbe.

Drinn macht de Computer kling, klong und kracht,
während sich drauße de Zapphahn selbstännisch macht.

Jetzt wäre zwä Zettel do, enner met 47 Mäck unn cnner met Null,
awwer zum Ghck war de Tank jo jetzt full.

Ess dut schnell bezahle unn rennt de Lade raus
unn fahrt ganz gemütlich dann nach Haus.

Die Musik schpeelt dem Märe zur Siesta:
“Ich fahr zum Tanke - met meim Fiesta !”

Straußbuwe, wemm iss die Kerb ? ...

So, ehr Leit, jetzt komm ich langsam zum Schluß,
weil das äfach emol sinn muß.

Unn e mancher, der do seine Name geheert,
hat sich doch hoffentlich net daran gesteeert.

Auch bei Eich, ehr Leit, muß ich mich bedanke,
daß ner noch do stehn, ohne se schwanke.

Doch bevor mer jetzt dojowwe es Esse genieße,
dun mer zuerscht noch unser Strauß begieße:

“DU SOLLSCHT ES GANZE JOHR IWWER HENKE,
DAß MER NOCH LANG AN UNSER KERB SERICK DENKE !”

Jetzt du ich mich noch bei unsere Musikande bedanke.
Er hann gut geschpeelt unn nothin gehn mer all zamrne enner tanke.

Ich mach mich jetzt emnner vunn der Läder
unn sah Eich “Tschüs”, mer siehn uns jo schpäder.